

Dr. Carol Forde di Universidad di Aruba

“Cu e programa ‘Erasmus’ nos studiantenan ta amplia nan horizonte cu oportunidadnan grandi”

ORANJESTAD- Cu hopi orguyo Prome Minister di Aruba Mike Eman y dr. Israel, dr. Forde y via skype representante permanente di Aruba na Brussels mr.drs. Cedrick Tilma y dos estudiante di Aruba na Alemania, a haci anuncio di un logro grandi pa Aruba cu ta e ‘Erasmus Charter’.

E logro aki ta encera cu Aruba a haya derecho di haci uzo di e programa ‘Erasmus’ danki na e certificacion cu a logra despues di hopi reunion y discusion riba e tema asina importante aki. Esaki ta haci posibel cu studiantenan di Universidad di Aruba por intercambia/studia cu un beca na Universidadnan acredita den Union Europeo y Merca cu cual UA tin relacion di partner.

Dr. Carol Forde, docente y coordinador di Asuntonan Internacional na Universidad di Aruba, ta un di e personanan cu a dedica hopi tempo den logro e Erasmus Charter pa Aruba.

“Pa Universidad di Aruba por a yega na remarca pa haci uzo di e programa di intercambio di estudio Erasmus,

mester a tuma cierto pasonan. E prome tabata pa a wordo acredita y haya e Erasmus Charter di Brussels pa asina nos studiantenan tin oportunidadnan igual cu esunnan cu ta intercambia cu nos Universidad.”

Forde a splica cu otro institucionnan di nivel superior di estudio na Aruba tambe por aplica pa e charter aki awor. Despues di tabata exitoso den logro e ‘Erasmus Charter’ e siguiente paso tabata pa busca fondo.

A aplica pa esaki den tres categoria. Becanan pa estudiante y docentenan pa studia/intercambia den UE pa e periodo di seis luna pa tanto nan bachelor como nan masters.

Becanan pa estudiante studia/intercambia na Merca (Universidad di South Carolina cu tin e programa ‘Erasmus’) y na di tres lugha financia cursonan di ley Europeo cu por wordo duna na UA.

“Nos tabata exitoso den tur tres nos proposicionnan”, Forde a bisa cu un bos di orguyo.

Forde a splica cu e logronan aki ta grandi pasobra di e forma aki studiantenan di Aruba



ta haya experiencianan esencial loke cu finalmente ta parti di un educacion moderno. “Nos tin caba dos estudiante

di Aruba na Deggendorf Institute na Alemania y na luna di januari 7 estudiante mas ta haci intercambio di estudio

cu beca di Union Europeo. Nos ta ocupa formando relacion di partner cu universidadnan den Union Europeo. Ya caba nos tin relacion di partner cu Spaña, Belgica, Alemania, Slovenia, Groenland y Inglatera.

Tur estudiante cu drenta Universidad di Aruba por ta sigur cu nan tin e oportunidad di por haci un semester den exterior. E oportunidad pa haci aplicacion ta tuma lugha dos bes pa aña. Nan por biaha na januari of september. Na januari ta bin tambe studiantenan di universidadnan di exterior cu cual nos ta partner.”

Mescos cu nos studiantenan ta importante pa enriquece e universidadnan di exterior cu nan conocimiento y nan cultura, esunnan di afo ta haci esaki pa nos universidad. Cu e intercambio cultural aki nos studiantenan ta amplia nan horizonte cu oportunidadnan grandi.

Esaki ta conta igual pa e studiantenan cu ta biniendo Aruba, sea di Belgica, Slovenia of Groenland y otro paisnan”, Forde a bisa. Aruba un bes mas den “front line” cu bon noticia. □